

Moral, disiplin murid2 jauh merosot—Dr. M

KUALA LUMPUR,

Rabu.—Moral dan disiplin murid-murid sekolah sekarang telah jauh merosot kalau dibandingkan dengan masa-masa yang lepas, demikian menurut Menteri Pelajaran, Dr. Mahathir bin Mohamed, hari ini.

Menurut Dr. Mahathir keadaan ini adalah disebabkan pengaruh dari luar sekolah.

Satu daripada langkah-langkah bagi mengatasi hal ini ialah, sekarang orang-orang yang tak ada sangkut paut dengan murid-murid tidak akan dibenarkan masuk ke kawasan sekolah.

Setengah murid-murid sekolah terlibat dalam kegiatan menghisap dan penagihan dadah, adalah satu bukti jelas tentang kemerosotan moral dan disiplin.

"Di masa-masa lalu, tidak terdapat masalah dadah di kalangan murid-murid dan di sekolah-sekolah, tetapi sekarang sudah ada," kesalnya.

Kemerosotan moral itu difahamkan, kebanyakannya berlaku di kalangan murid-murid peringkat menengah dalam



DR. MAHATHIR

kawasan-kawasan bandar.

Dr. Mahathir menegaskan, kementeriaannya memberi perhatian berat dalam perkara itu kerana ia mempunyai pertalian dengan kemajuan pelajaran murid-murid.

Tak dibenar

Dalam mengawal moral dan disiplin itu, tambahnya, beberapa peraturan sedang dijalankan di sekolah-sekolah.

Salah satu daripadanya ialah; orang-orang lain selain daripada ibu-

bapa dan penjaga, tidak dibenarkan masuk ke kawasan sekolah, katanya.

Jelasnya, kawalan ini diadakan adalah untuk menyekat orang-orang yang tidak bertanggungjawab dari membawa masuk pengaruh-pengaruh yang tidak sihat.

Sementara itu, katanya. Guru-guru Besar mempunyai kuasa merotan murid-murid yang didapati melakukan kesalahan seperti melanggar peraturan-peraturan dan disiplin-sekolah.

Katanya lagi, Guru Besar boleh menyuruh atau membenarkan guru-guru lain menjalankan tindakan merotan, sekiranya beliau telah berpuashati dengan kesalahan yang dilakukan oleh seseorang murid itu.

Dr. Mahathir menyatakan, kawalan disiplin di sekolah-sekolah tidak akan memberi erti, sekiranya ibubapa dan para penjaga tidak memberi kerjasama yang sepenuhnya.

Menteri Pelajaran itu menyeru ibubapa supaya sentiasa mengambil berat terhadap disiplin anak-anak semasa di rumah dengan mengambil tahu setiap aktiviti dan pergaulannya.